

120 minen brüder ledig haben.“ Also schiedent sū on alle ende, und do reit
 der markg(ro)fe widerumb zūm künge und zū den herren und sprach
 zūm künge und zū den herren: „Ich komme on alle ende, wenne herczog
 Iohans hat gesprochen, er welle sinen brüder losz en ledig haben oder es
 125 sol in lip und gūt kosten, und wil ouch keine rede mer hören.“ Do sprach
 der künig zūm markg(ro)fen: „Rit widerumb zū minem brüder und
 sprich, das er mir helfe, das hinran komme, oder er bringet mich umb lip
 und gūt.“ Do reit der margg(ro)fe wider zū herczog Iohans und seite ime,
 als in der künig geheissen hatte. Do sprach herczog Iohans: „Ich sol
 130 minen brüder ledig sehen, ôbe ich iemer wort noch rede me welle reden,
 es koste sach wz es welle.“ Do sprach der margg(ro)fe von Missen zū
 herczog Iohans: „Lieber ôhem, lossencz nur geworden, ich wil ūch helfen,
 dz uwer bruder ledig werde oder ich wil niemermer darumb geriten. Also
 das der herczog und der margg(ro)fe eindrechtig wūdent, wie das man
 briefe sōlte machen, wie das die lantherren sicher wūdent irs libes und irs
 135 gūtes, do rette der markg(ro)fe mit herczog Iohans, das er sōlte kommen
 zū Proge, so er nechste mōchte, uff das, dz man den briefen do ein ende
 machte. Also schiet der markg(ro)fe von herczog Iohans, daz herczog
 Iohans nūt anders enwūste, denne dz der künig, sin brüder, ledig sōlte sin.
 Des morgens glich dem tage, do kam herczog Iohans botschaft, das die her-
 140 ren den künig enweg gefūrt hattend. Do sas herczog Iohans uff mit allen
 sinen lūten und reit zū Proge und sante in die nuwe stat, ôbe sū in in wol-
 tend loszen oder nūt. Sū sahent nūn wol, ôbe die herren nūn recht hat-
 tend getan oder nūt. Do enbuttend sū ime widerumbe, das er keme, sū
 woltend ime gerne die tor ufftūn und woltend ime die slüssel darzū geben
 145 und tun, wz ime dienst und lieb wer, dem künge und ime.

Item ouch hant sū gemūttet an den künig und an herczog Iohans von
 sinen wegen achte slosz, die sū uszerkiesen woltent zū Behem in dem lan-
 de und mit nammen den Karlestein, Bürgelins und den Betteler.

Item do hat geantwurtet herczog Iohans von des küniges, sins brüders,
 150 wegen und sprach: Er hatte nūt macht, des küniges slosz, sins brüders, en-
 weg zū gebende noch zū verseczende; er wolte aber gerne sinen lip und
 sin gūt verseczen und sin lant und sine lūte den lantherren, das sū sicher
 werent.

Item ouch hat margg(ro)fe Iost und die lantherren vil briefs gemacht
 155 ūber vil sachen in der zit als der künig sins selbes nūt gewaltig wz, und die
 ouch besigelt sint mit der magestat.